



21.10.2024

UKA2024/122

Matumuuna Inatsisartut ingerlatsinermut maleruaqqusaanni § 33 tunngavigalugu siunnersuut una saqqummiunneqarpoq:

Najukkani innuttaasunik kiisalu takornarianik nunanit allaneersunik suliarinninnissamut pisussaaffik naammassisinnaaniarlugu takornariat amerlanerpaaffianni Kalaallit Nunaanni peqqinnissaqarfimmi peqqinnissakkut sulinneqarnermi ikiorserneqartarnissamik aaqqissuulluakkamik isumaqatigiissuteqarnissaq siunertarlugu nunarsuarmi peqqinnissakkut suliniaqatigiiffissuarmut, WHOmut, attaveqarnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anna Wangenheim, Demokraatit)

Inatsisartuni ilaasortaq Anna Wangenheim, Demokraatineersup siunnersuutaannut siumumiit imaattumik oqaaseqassaagut.

Siumuminngaaniit pingaartipparput kalaallit nunatsinni innuttaasut peqqinnissaqarfitsinngaaniit pitsaasumik toqqissisimanartumillu sullinneqarnissaat. Siumuminngaaniillu aamma ilisimaarivarput allamiut nunatsinnut tikittut perulunneratigut passunneqarsinnaanissaat peqqinnissaqarfiup pisussaaffittut akisussaaffigisaminni suliassaannut ilaanera.

Peqqinnissaqarfitta ingerlanneqarneranut ukiuni kingullerni politikkerit aalajangernikuupput peqqinnermut ataatsimiititaliamik pilersitsinissaannik, tamannalu siumuminngaaniit iluarisimaarlugu peqataaffiginikuarput. Siumumimmi pingaartikkatsigu kalaallit nunatsinni peqqinnissaqarfigisatta ullutsinnut tulluarsarlugu nutarterneqarnissaa pissusissamisoortussaassasoq. Taamaammat peqqinnermut ataatsimiititaliarsuaq qilanaarluta pissangallutalu utaqqisimavarput. Suliaq naammassimmat saqqummiisoqarnerani peqataasimavugut. Peqataanitsinni saqqummiussat ataatsimiititaliarsuarminngaaniit innersuussutigineqartut amerlasuut tusarnaarsimavagut, tassami 100 sinnerlugit innersuussutaammata pingaarnersiuiinissamik siumuminngaaniit eqqartueqataariarluta Naalakkersuisut isumaqatiginninniarnerannut suliamut siulliusussamut peqataasimavugut. Isumaqatigiissullu naammassimmat atsioqataasimalluta.

Siumuminngaaniit pingaartissimavarput peqqissutsimut ataatsimiititaliarsuup innersuussuteqarneratigut alloriarfinnik siullerni peqqissaartumik alloriarnissatsinnut innuttaasut sinnerlugit peqataanissarput.

Massakkut inatsisartuni ilaasortap Anna Wangenheim, Demokraatineersup siunnersuutaanut atatillugu paasivarput Naalakkersuisut aasaq julip 1-ani atsioqatigiittoqarsimasoq WHO- lu paaseqatigiinnissamik kiisalu aamma sulisoqarnikkut nunatsinni nukittorsaaniarneq eqqarsaatigalugu.

Taamaammat siunnersuuteqartup Naalakkersuisut suliassanik aallartitsereersimmata siunnersuutaa ilalersinnaanagu oqaatigissuarput.

Mala Høyr Kúko, Siumut